

摘藻堂四庫全書薈要

史部

欽定四庫全書薈要

史部

御批續資治通鑑綱目卷二十四



詳校官編修臣汪鏞

欽定四庫全書薈要卷七千四百九 史部

御批續資治通鑑綱目卷二十四

起乙未元成宗元貞元年  
盡辛亥元武宗至大四年 凡十七年

成宗皇帝元貞元年春正月以劉國傑為湖廣平章



辰澧地接溪洞宋嘗選民立屯免其繇役使禦諸蠻  
在澧曰隘丁在辰曰寨兵宋亡皆廢國傑悉復其制  
又視盜出入之地置戍三十八所分屯將士以守之  
由是東盡交廣西亘黔中周湖廣四境皆有屯戍制  
度制密諸蠻不能復寇入朝賜玉帶錦衣旌旗功臺  
臣言國傑在軍中每傾家貲賞賚將士帝命估償之

二月帝如上都○翰林學士承旨留夢炎致仕

上以其在先朝言無所隱厚賜遣之初世祖嘗問夢炎業李優劣於趙孟頫對曰夢炎臣之父執其人重厚篤於自信好謀能斷有大臣器業李所請之書臣皆讀之所能臣皆知之能之世祖曰汝以夢炎優於李邪夢炎為宋狀元至宰相當賈似道誤國依阿取容李以布衣乃伏闕上書是賢於夢炎也

發明

夢炎攻宋臣也而以元爵書何哉賣國求利之背主事仇是非亡宋之臣也以元爵書之其

罪自見而不免勒令致仕者則亦使後之君子安於義命毋非覲以微利耳然則鴟梟小人徒負不

義之名者果何益哉如五代書

梁禮部尚書蘇循致仕同意

廣義

觀孟頫論夢炎人品要亦為己而設及世祖右葉李而左夢炎于時不知孟頫之顏曾不

為之  
厚乎

三月安南入貢○地震○夏四月廣京師賑糶米肆

帝以京師米貴益廣世祖之制設三十四發米七萬  
餘石糶之其肆每年增糶多至四十萬石行之既久  
多為強豪巧取乃令有司籍貧民戶數驗口給之  
減賑糶之直三分之一每歲亦不下二十餘萬石

閏月蘭州河清

上下三百餘  
里凡三日

發明

河清往往以為國之祥瑞羣臣稱賀者有之  
中外上表者有之此皆諛臣庸主之通患也

善治天下者以豐年為瑞以賢才為寶其他如景  
星慶雲靈芝甘露不足為祥也今蘭州河清議者

皆謂元嘉祥殊不知綱目未修則固以為嘉祥綱目既修則足以為災異此綱目取法春秋之意也苟以為嘉祥則下文必無陝西旱饑之書矣明乎此然後可知君子筆削之深意云

廣義

河清之事臣前論之備矣非瑞也書之所以著元運之衰

釐正選法

省臣言阿哈瑪特僧格怙勢賣官無賢否選法大壞詔敏珠爾多卜丹何榮祖等釐正之

五月陞江南諸縣為州

以戶為差戶四萬五萬者為下州五萬至十萬為中州凡為中州二十八下州十五又以戶不及額降連州路為州

# 六月陝西旱饑

行省右丞許扆議發廩賑之同列以未經奏請不可扆曰民為邦本今饑饉若此若俟命下無及矣擅發之罪吾當任之遂發粟賑貸命亦尋下

## 發明

軍旅之後必有凶年此春秋已驗之事也是時軍旅煩興弊政未息而民怨懟之氣足以感召天變而乾旱作矣古者三年耕必有一年之畜九年耕必有三年之畜是以雖有凶年民無菜色以其有畜故也成宗即位未幾而災異迭見亦未見其有恐懼修省之實也既旱而饑民病深矣

## 廣義

許扆可謂識時達權者也

秋九月帝還大都○冬十一月伊實特穆爾卒○十二

月立皇后巴約特氏

丙申 二年春正月詔諸王公主駙馬母輒罪官吏

時諸王錫錫等部曲率恣橫擾民駙馬曼濟台私殺  
有罪有司官吏輒被號召至是詔令非奉旨毋輒加  
罪

發明

欲治乎外先治乎內欲正乎疎先正乎親其  
內不治難以治外不正乎親難以正疎今成

宗禁宗室外戚毋罪官吏是亦能知其  
弊而革之於已然者乎故書以予之

二月以博果密為昭文館大學士平章軍國事丹津為

平章政事



博果密以與同列多異議久稱疾不出帝曰朕知卿疾之故以卿不能從人人亦不能從卿也欲以丹津代卿何如博果密曰津實勝臣乃拜博果密為昭文館大學士平章重國重事辭曰是職也國朝惟史天澤嘗為之臣不敢當制去重字而以津代為平章政事

廣義

博果密之於成宗可謂君臣相遇者也然則元之狂瀾未倒者博果密為之砥柱也直書

于冊美  
自見矣

三月帝如上都○夏六月頒官吏受賕條格

凡十三等南臺御史大夫阿喇卜丹言立法貴於輕重得宜使民不至易犯今所降條格除枉法外其不枉法者自二十兩以下罪與受一分者同科似輕重少偏

# 秋八月立捕盜賞格

御史臺臣言內地盜賊衆多乞立條格督責所屬期至盡滅乃詔諸人能告捕者強盜一名賞鈔五十貫竊盜半之應捕者又半之皆徵諸犯人無可徵者官給之時山東東西道廉訪使陳天祥上疏曰盜賊之起各有所因除歲凶誅之天時宜且勿論如軍興不息工役薦興厚歛煩刑皆足致盜中間保護滋長之者赦令是也赦者小人之幸君子之不幸被強梁之徒執兵殺人者司盡力以擒之朝廷加恩以釋之且脫係累暮即行劫既不感恩又不畏法夫凶殘悖逆性已頑定誠非善化所能移惟嚴刑以制之可也天祥既上疏乃嚴督有司追捕自其所部南至漢江二十餘里多就擒者

## 廣義

孔子曰苟子之不欲雖賞之不竊天祥之論不亦當乎但曰民非善化所能移無乃意圖

而語  
滯乎

### 括江南隱蔽田

凡已延阿珠阿爾哈雅等下江南所  
據田及權豪隱蔽者悉括之令輸租

### 冬十月贛州兵起江西行省左丞董士選擊平之

贛州民劉六十聚眾至萬餘建立名號朝廷遣將討  
之觀望退縮賊勢益盛士選請自往進至興國距其  
營不百里命將校分兵守地悉置激地之人於法復  
誅奸民之為囊橐者於是民爭出自效數日六十就  
擒餘眾悉散事平士選遣使奏聞但請黜賊  
吏數人而已畧不及破賊事時稱其不伐

### 發明

綱目於盜賊則書兵起以討罪則書擊之然  
其書法義利內外之辨雖易世而猶未已也

其旨  
嚴矣

丁酉大德元年春正月以額森特穆爾為平章政事○帝  
如上都○太后幸五臺山

初為太后建寺於五臺山至是成太后將臨幸之數  
察御史李元禮上疏言五臺山創建寺宇工役俱興  
供億煩重民不聊生伏聞太后臨幸五臺尤不可者  
有五盛夏禾稼方茂民食所仰騎從經過不無蹂躪  
一也親勞聖體經冒風日往復數千里山川之險萬  
一調養失宜悔將何及二也天子舉動必書簡冊以  
貽萬世書而不法將焉用之三也財不天降皆出於  
民今日支持調度百倍曩時而又勞民傷財以奉土  
木四也佛以慈悲為教雖頓天下珍玩供養不為喜  
雖無一物為獻亦不怒今太后欲為兆民祈福而先

勞聖體使天子曠定省之禮五也伏望回轅中道端  
處深宮上以循先皇后之懿範次以盡聖天子之孝  
誠下以慰元元之望如此則不祈福而福自至矣臺  
臣不敢以聞其後侍御史萬僧與中丞崔彥有隙取  
元禮章封入奏之曰崔中丞私比漢人李御史為大  
言誇佛謂不宜建寺帝怒命鄂勒哲博果密鞠之鄂  
勒哲曰吾亦嘗以此諫太后曰我非喜建此事蓋先  
帝嘗許為之非汝所知也博果密曰他御史懼不敢  
言言者惟一元禮可賞鄂勒哲等入言之帝沈思良  
久曰御史言是也乃罷萬僧復元禮職○初司程陸  
信等董建寺之役驅迫民夫數千冒險入山谷伐木  
運石死者萬餘人河東廉訪使主忱乘太后幸五臺  
因言建寺本以福民今福未及而害已甚恐非朝  
廷意也太后聞之為減其役仍賜恤死者之家

## 發明

莊二十年春二月經書夫人姜氏如莒君子  
譏之今太后幸五臺而綱目書者禮義天下

之大防也其禁亂之所由生猶防止水之所自來也婦人從人者也夫死徙子而成宗夫子之道不能防閑其母禁亂之所由生彼婦人無故不踰閭閻况太后天下之母尤非閭里之婦可比擅興土木建寺五臺無故離京恣為遊幸成宗未聞幾諫惟務阿徇豈不深可惜哉直書于冊其義自見

廣義

元禮諫后一疏可謂善矣非鄂勒哲博果密之教亦難乎免于下獄矣孰知蒙古中而有

若人也哉

夏四月朔日食○秋七月河決杞縣蒲口

先是河決汴梁發丁夫三萬塞之至是蒲口復決乃命蘆訪使尚文相度形勢為久利之策文言河自陳留抵睢東西百有餘里南岸視水高六七尺或四五尺北岸故隄水視田高三四尺或高下等大較南高

於北約八九尺隄安得不壞水安得不北也蒲口今  
決千有餘步東走歸舊瀆行二百里至歸德橫隄之  
下復合正流或強過之上決下潰功不可成揆今之  
計河北郡縣宜順水性築長隄以禦汎濫歸德徐邳  
之民任擇所便避其衝突被害民戶量給河南退灘  
地以為業異時決他所亦如之亦一時救患之良策  
也蒲口不塞便帝從之會河朔郡縣及山東憲部爭  
言不塞則河北桑田盡化魚鼈之區塞之便帝復從  
之是後蒲口復決降塞之役無歲無  
之而水北入河復故道竟如文言

## 祇星出奎

### 發明

書曰惠迪吉從逆凶惟影響成宗所為靡善  
故逆氣乘之感召天變彼如日者衆陽之宗

人君之表河決者陰氣之徵祇星者逆氣之乘皆  
所以兆當時之象而警當時之君也成宗置之度

外怒然弗懼何其謬哉自書契以來天變之形未  
有無其應者成宗曷不加意耶以當時之天變驗  
當時之政事則天  
人之理可想見矣

九月帝還大都○冬十月欽察都指揮使綽和爾攻  
破巴林之地還擊海都軍敗走之

巴林之地時為海都所據綽和爾帥師踰金山進攻  
之其將達蘭台阻達噠嚕噶河而軍伐木柵岸以自  
庇士皆下馬跪坐持弓矢以待綽和爾奮師馳擊大  
破之盡得其人馬廬帳還次阿魯河與海都援將巴  
拜遇綽和爾麾軍渡河感  
之巴拜敗走僅以身死

以吳元珪為吏部尚書



時選曹銓注多有私其鄉人者元珪曰  
此風不可長自視事請謁悉皆謝絕

### 禁諸王駙馬奪民田

仍禁民間以公私土  
田呈獻及受其獻者

#### 發明

前書詔諸王駙馬毋輒罪官吏此書禁諸王  
駙馬奪民田皆所以深予其草弊也成宗其

庶幾憂勤  
于民事矣

### 戊戌二年春正月增太廟牲用馬

從伊徹察喇請也凡舉大舉其馬牲既與三牲同登  
于俎而割奠之饌復與籩豆俱設將奠牲盤酌馬漣則  
蒙古太祝升詣第一座呼帝后神諱以致祭年月日  
數牲齊品物致其祝語列室皆如之禮畢則以割奠

之餘撒于樞星門外名曰拋撒  
茶飯蓋以國俗行事尤所重也

## 二月以張九思梁德珪並為平章政事

初太子珍戩卒朝議欲罷詹事院九思時為詹事丞  
抗言曰皇孫宗社人心所屬詹事正所以輔成道德  
者奈何罷之尋進拜中書左丞德珪一名梁溫都爾  
世祖時參知政事治事有敏才京師地震世祖怪州  
郡報囚之數過多德珪曰當國者急於徵索蔓延  
收擊以致此爾帝悟為赦中外逋負尋拜右丞

## 罷中外土木之役

先是中書省臣屢言諸王藩戚賜與繁重向之所儲  
散之殆盡至是遂諭省臣會計天下財帛歲入及賜  
與營建歲費之歲鄂勒哲因言歲入之數不償所費  
又豫於至元鈔本借二十萬錠因以節用為請帝為

罷中外土  
木之役

# 帝如上都○開鐵幡竿渠

時欲開鐵幡竿渠召郭守敬至上都議之守敬曰頻年山水暴下非大為渠堰廣五七十步不可執政吝于工費以其言為過縮其廣三之一明年大兩山水注下渠不能容漂沒人畜廬帳幾犯行殿帝謂省臣曰郭太師神人也惜其言不用爾

## 發明

上書罷土木之役所以予其省無益也然而土木之役罷未幾而開鐵幡竿渠即見于下

曾謂開渠非土木之役乎蓋由其心無定主因物有遷前因郭勒哲言而罷土木之役此因郭守敬之言而開鐵幡竿渠則其易惑難曉朝令夕改不於是而可見乎比而觀之則成宗之治國蓋可見

矣

三月以兩淮閒田給蒙古軍○夏五月以何榮祖為平章政事○六月徵湖廣夏稅

初阿爾哈雅下湖廣罷宋夏稅用內郡例改科門攤每戶一貫二錢蓋是夏稅增鈔五萬餘錠至是宣慰張國紀復請科夏稅與門攤併徵湖相重罹其害御史臺以為言詔趣罷之尋後改門攤為夏稅而併徵之每戶計三貫四錢之上

視江浙江西為差重云

發明

夏稅未嘗書此書何譏病民也古者什一而稅民無科擾今而因張國紀之言請科夏稅

門攤併徵由是湖湘之間重罹其害矣  
豈不深可歎哉特書曰徵蓋譏之也

秋七月大雨河決

深歸德屬縣田廬禾稼詔免田租一年遣尚書諾海御史劉慶等塞之自蒲口首事凡募九十六所

召高麗王諶入朝

高麗王距既傳國於其子諶有言諶借設司空司徒等官而又擅殺其臣金呂中書請詔諶入朝因留不遣復以妃配為高麗王

江西江浙水○九月帝還大都○冬十二月定歲課三十取一○命廉訪司歲舉廉幹者各二人○彗星見

出子孫  
星下

發明

嗚呼災異之多未有多於成宗之世也書大雨河決書江西江浙水書彗星見數月之間

三異迭出此蓋人事無稽天象隨見是皆綱目之特筆而非元史之舊文也元成濶豫未嘗修省悲

夫綱目比書于冊所以為後世人君不重天變之戒耳於元乎何誅

駙馬高唐王奇爾濟蘇勒兵備邊遇寇敗沒

是歲秋諸王將帥共議備邊事成曰敵往歲不冬出且可休兵于境奇爾濟蘇獨嚴兵待之冬敵果大至奇爾濟蘇三戰三克乘勝逐北馬躡為敵所執誘使降不屈人欲妻以女奇爾濟蘇毅然曰我天子壻也非天子命而可再娶乎竟不屈死焉

乙亥 三年春正月遣使問民疾苦

省臣以天變屢見諸依故事依答避位上曰此漢人所說豈可一一盡從邪卿但擇賢者任之爾時翰林學士闕復亦因星變上書陳數事且言古者刑不上大夫今郡守之責以徵租受杖非所以勵庶隅江南公田租太重宜減以貸貧民多采用之

### 發明

春省耕而補不足秋省歛而助不給此先王憂民之意也一民之饑猶已飢之一民之寒

猶已寒之恤其饑寒救其疾苦此因為民父母之盛心書曰如保赤子良有以也成宗因星變民饑之故惕然於中遣使按問則其恤饑寒救疾苦之意為可見矣曰視疾民如讐恕不之顧者寧無彼善于此哉故特書予之

### 廣義

昔漢文帝賜民田租之半國史褒之後世賢之凡以其知民者國之本財者民之心傷其

心則是傷其本其本既傷烏有枝葉獨茂者哉從好利之君不此之察惟欲利歸于上是猶日斷其本而望其枝葉之茂元人知此而有是舉美可知矣當時之民一何幸哉

### 以哈喇哈斯為左丞相

帝問閣復曰中書左相難其人卿試舉所知誰可任者復以哈喇哈斯對遂由江浙左丞相召入用之

### 二月帝如上都○遣僧一山使日本

江浙平章政事伊蘇岱爾復勸帝用兵日本帝曰今非其時因其俗奉佛遂遣一山往使而日本竟不至

### 發明

往使絕域必得忠義門望如宋之洪皓富弼諸賢則不辱君命矣今乃因日本奉佛遣僧

使之則是失使人之道而虧國體矣豈不深可醜哉直書于冊不再貶而其失自見



命何榮祖等更定律令

帝諭榮祖曰律令良法也宜早定之既而書成上之且言臣所擇者三百八十條一條有該三四事者帝曰古今異宜不必相沿詔元老大臣衆聽之未及頒行而榮祖卒

夏五月復立征東行省

尚麗王昫既復爵既而使臣自其國還者言昫不能服其衆乃復立征東行省以福建都元帥奇爾濟蘇為平章政事共理之

秋七月放江南僧寺佃戶五十萬為編民

江南編民五十餘萬悉入嘉木揚州勒智寺籍為佃戶至是因省臣言檢放之

凡日月之薄蝕  
原有定數若日  
食二分有奇其  
象甚微且當已  
時陽光方感仰  
觀未明遂以當  
食不食為說可  
謂浮誕矣今日  
食不及三分皆  
不報不入占誠  
為有見

八月朔太史奏日食不應

太史言是日已時當日食二分有奇至期不食眾懼  
保章正齊履謙曰當食不食在古有之矧已時近午  
陽盛陰微故當食不食遂考唐開  
元以來當食不食者凡十事以聞

九月帝還大都○冬十二月以鄂爾根薩里為平章政

事

帝初撫軍北邊數召鄂爾根薩里不往世祖遣奉皇  
太子寶僅一至及即位語之曰朕在潛邸誰不願侍  
朕者惟卿數召不往真得大臣體自是召對不名賜  
坐視諸侯王嘗語左右曰若全平章真全材也命復  
入中書鄂爾根薩里父別  
名萬全故以全為氏云

命兄子哈尚鎮漢北

哈尚帝兄達爾瑪已拉之長子帝以寧遠王庫庫楚總兵北邊怠于備禦命哈尚即軍中代之

省民出公田租

時公田為民害而荆湖尤甚部內實無田隨民所輸租取之戶無大小皆出公田租雖水旱不免荆湖宣慰使立智理威上民所不便十餘事於朝而言公田尤切廷議遣使理之會有詔凡官無公田者始給以俸民力少蘇馬

發明

王者有愛民之心則必有愛民之政有憂民之心則必有憂民之政在人君所為何如耳

然古之人君未有愛民而七其國者亦未有憂民而覆其邦者是時公田優害天下騷然成宗頗能

垂下令省田租則其愛民憂民之心可謂一舉而兩全者矣豈不為盛德之事也哉據事直書蓋予

之耳

庚子四年春二月朔日食○皇太后鴻吉哩氏崩

后有曠德事昭庸順聖皇后執婦道甚謹及尊為太后置徽政院掌其財賦院官有受獻浙西田七百頃者籍於位下后曰我寡居婦人衣食自有餘况江南率土皆國家所有曷敢私之即命盡易院官之受獻者后之弟欲因后求官后拒之曰勿以累我也崩議徽仁裕聖皇帝

三月帝如上都○夏四月以布呼齊為平章政事○五月緬阿散哥也弒其王的立普哇拿阿廸提牙遣雲南

平章政事色辰額呼等發兵討之

初緬人僧哥倫等亂緬王執其兄阿散哥也尋釋之阿散哥也乃率其黨囚王於家牢因弑之王次子奔

想京師詔遣色辰額呼等率行省兵二千人討之

發明

弑君天下之大惡討賊天下之至公綱目原於人心而定罪君子順於天理而用刑阿散

哥也以臣而弑其君天下之大惡也成宋出師而討賊天下之至公也元世用師不一皆未合義惟此差強人意故特變文而書討所以予其誅亂討逆之公也又豈窮兵黷武之比哉此綱目書法之

深意

耳

昭文館大學士平章軍國事博果密卒

初世祖每聞博果密之言必歎曰恨卿生晚不得早聞此言然亦吾子孫之福臨終以白壁遺之曰他日持此以見朕也博果密雖顯要而家素貧卒無以葬鈔賻賜之贈魯國公謚文貞

發明

元學士帶平章軍國事者多矣未有於其卒而書之者獨博果密特書于冊所以表其盡

忠乃職而深亦其褒焉耳

廣義

抑觀博果密之事成宗世祖無得而議其言益可知矣况其所折挫暴君如止嬰兒之欲

非德望素孚者能之乎故綱目於其卒而備書其銜者誌其美也

秋八月更定蔭叙格

正一品子叙正五從五品子叙從九餘以是為差蒙古色目人持優一級

閏月帝還大都○冬十二月遣雲南行省左丞劉深將  
兵擊八百媳婦

郭勅哲因劉深言勸帝曰世祖以神武一海內功蓋  
萬世今陛下嗣大歷服未有武功以彰休烈西南夷  
有八百媳婦奉奉正朔請往征之哈喇哈斯曰山嶠  
小夷遠絕萬里可諭之使來不必遠勤兵力不聽竟  
發兵二萬命深及哈喇岱等將之以往御史中丞董  
士選亦言不當輕信一人妄言而寘百萬生靈於死  
地帝變色曰事已成  
卿勿復言魔之出

發明

以武功定天下以文教興太平此先王之法  
也世祖既以武功定天下成宗宜以文教興

太平郭勅哲劉深之徒專用武功以彰休烈斯言  
豈不違君之惡乎其遠人來服也則修文德以來

之既來之則安之聖人之服遠人不過如此安可  
稱干比戈較勝遠夷而始謂稀世之功乎他日兵  
連禍結羅塗炭誰實尸之元臣謀國不  
戒而致是感惜哉故直書擊以深貶之

**廣義**

大抵八百媳婦乃窮荒極遠之國雖以秦皇  
漢武之強未嘗得以征之也今成宗乃正宗

成之時何以武功為哉借曰武功亦不當如是之  
黷也鄂勒哲之與博果密無所軒輕者也觀其勸  
帝之言其不逮博果密遠矣使博果密若在成宗  
豈有是哉孟子所謂格君心之非者其博果密之  
也謂

辛丑五年春正月罷征東行省

先是征東行省平章奇爾濟蘇言高麗王擅署官府  
及借用天子禮儀器物况官冗民稀刑罰不一若止



依本俗行事實難撫治帝遣刑部尚書王泰亨等往  
釐正之既而王矩言設行省監制其國不便帝亦以  
奇爾濟蘇而能和輯高  
麗遂罷行省徵之遂

### 夏五月劉深兵次順元蠻酋宋隆濟等連兵反

劉深等取道順元遠冒煙瘴未戰士卒死者已什七  
八驅民轉餉谿谷之間一夫負粟八斗率數人佐之  
數十日乃達死者亦數十萬人中外騷然而深復令  
雲南調民供餽及脅求水西王官之妻蛇節金三千  
兩馬三千匹隆濟因給其衆曰官軍徵發汝等將志  
剪髮黥面為兵衆惑之隆濟遂連蛇節率苗獠諸蠻  
攻破損黃諸寨進攻貴州知府張懷德力戰敗  
死遂圍深窮谷中梁主庫庫兵救之賊衆稍却

### 廣義

劉深以狗馬之見致寇表師罪不容誅矣然  
則綱目備書之者一以誌遠人終難臣服之

理一以誌元人貪得無厭之實後之有天下者惟當修內治而已彼遠夷之服與不服奚暇計哉書曰無怠無荒四夷來王元人何足以知此

### 秋七月詔色辰額呼移兵代金齒諸蠻

時征緬師還為金齒所遮士多戰死金齒地連八百媳婦諸蠻相效不輸稅賦賊殺官吏詔遣色辰額呼等移征緬兵討之

### 發明

聲罪致討曰伐此何以書伐王師討緬金齒邀遮則是助逆無道而有衅可乘故書伐所

以循名而責實也此所以為是非之權衡耳若惡其窮兵之故而槩以擊書何以謂之綱目哉

### 廣義

自古有天下者未有如元代之盛也今而頽歲與窮寇爭鋒譬猶富翁與貧人窶子較織

毫之利豈得為智乎觀者比而論之則元人貪婪無識也瞭然矣

# 八月彗出井入紫薇垣

## 發明

凡書彗字皆兵之象也是時征伐四夷黎民愁怨詩不云乎有芄者狐率彼幽草有棧之

車行彼周道比之謂也然則天變之來乃民怨憤之氣并之所致既出于井又出紫薇其異莫甚于此矣苟使成宗悔悟省躬責己期底治平則遠人不期服而自服天變不期消而自消何必勞師遠涉然後為快也哉

# 海都復大舉入寇哈尚大破之海都走死

海都與都爾幹諸部大舉入寇哈尚督綽和爾等五軍合擊大破之河賓克射都爾幹中膝遁去海都不

得志引遠  
旋亦死

九月誅高慶察罕布哈免色辰額呼為庶人

色辰額呼等兵攻阿散哥也不克引遠言賊降在旦夕慶等受其賂首倡為遠計是以無功詔遣官鞠之得色辰額呼以下將校受賂狀詔誅慶及察罕布哈色辰額呼等遇赦削奪官爵為庶人

發明

高慶等既承君命弔伐緬邦則必誅其叛臣立其故主撫其羣黎宣上德澤然後旋師則

不辱君命矣夫何受彼賄賂倡為遠計則不惟縱賊不討抑且自肆無君其罪甚明不容諱者故高慶書誅罪首謀也無辰額呼書免罪從謀也然後罪之輕重可見而權之高下可知矣此綱目之斷

案也

# 禁酒

時以歲凶禁酒仍弛  
山澤之禁聽民逆獵

# 冬十月益海運糧

以畿內歲饑增明年海  
運糧為百二十萬戶

# 帝還大都○十一月遣劉國傑率師討之隆濟及蛇節

劉深兵敗帝始悔不用哈喇哈斯及董士選之言乃  
遣劉國傑及楊賽音布哈等率四川雲南湖廣各省  
兵分道進討諸蠻別敕梁王提兵  
應之軍中機務一聽國傑處分

# 發明

朝廷用兵本及八百媳婦而宋隆濟等之無  
預也夫何連兵相及共抗王師則其逆節已

明罪惡甚矣故變文而書討  
此綱目輕重之權衡也噫

壬申 六年春正月免朱清張瑄官尋誅之

二人父子致位顯要宗戚皆累大官田園館舍徧天下巨艘大舶交諸蕃中廩藏倉庾相望車馬填塞門巷僕從佩金虎符為萬戶千戶者累數十人江南僧石祖進撫其不法事上聞時中書亦言二人屢致人言宜罷其官詔御史臺鞠之既而伏誅尋籍其家禁錮其親屬流其妻子遠方其妻子被逮時賂江浙平章托克托祈蔽其罪托克托以聞帝喜曰托克托我家老臣子孫其志固宜與衆人殊也賜內帑黃金五十兩以旌之

廣義 考之朱清張瑄及宋季之海盜因其備知海道曲折故使其掌都漕運萬戶府由是欺上

圖下遂致富殷固足以見元人用人之失矣然則何以書免朱清張瑄官尋誅之曰此正名定罪又足以見元人之得也學者味之

# 劉深引兵還南臺御史中丞陳天祥上書諫伐西南夷不報

宋濟隆累攻圍貴州不解深等糧盡道梗不通遂引兵還隆濟復率衆邀之韜重委棄士卒殺傷殆盡南臺御史中丞陳天祥上書諫曰八百媳婦乃荒裔小夷取之不足以為利不取不足以為害而劉深欺上罔下帥兵伐之經過八番縱橫自恣中逢變生所在皆叛既不能制亂反為亂衆所制食盡計窮倉皇退走喪師十八九棄地千餘里朝廷再發四省之兵使劉二也圖總督以圖收復湖南湖北大發運糧丁夫

衆至二十餘萬况當農時驅此愁苦之人往迴數千里中何事不有比聞從征敗卒言西南諸夷皆重山複嶺陡澗深林其窄隘處僅容一人一騎上如登高下如入井賊若乘險邀擊我軍雖衆亦難施為或諸蠻遠遁阻隘以老我師進不得前旁無所掠將不戰自困矣且自征伐倭國占城交緬諸夷以來近三十年未嘗有尺土一民之益計其所費可勝言哉去歲西征及今此舉何以異之乞早正深罪仍下明詔招諭被必自相歸順不須遠勞王師與小醜爭一旦之勝負也為今之計宜註兵近境多市軍糧內安外固漸次服之此王者之師萬全之利也苟謂業已如此欲罷不能亦當詳審成敗算定而行彼諸蠻皆烏合之衆必無久能同心捍我之理但急之則併力緩之則相疑以計使之互相讎怨待彼有可乘之隙我有可動之之時徐命諸軍數道俱盡服從者懷之以仁抗敵者成之以武恩威兼濟功乃易成若復舍恩任威



深蹈覆轍恐他日之患有甚於今日者也不報遂謝病去

發明

善言者不善事之模範不善言者善事之孫賊是以古之人君不以一己之聰明為聰明

而以衆人之聰明為聰明所以用人則大自用則小堯舜以衆人之聰明為聰明然後治隆俗美桀紂以一己之聰明為聰明遂至身世國亡時用兵西南之夷劉深無功而返陳天祥上疏直諫言甚剴切帝不見聽可勝惜哉嗚呼自用而不用人其流之弊不至於桀紂之轍者幾希矣故書不報以深

貶之

廣義

分註載天祥一書何其曲盡人情而善與元人謀固也夫何元人專務貪得雖有嘉謨嘉

猷曾不為之一介于意焉譬則聾者之於大韻瞽者之於子都耳惡能致其聰視耶使天祥於此而

不去則其見與是書背矣何足貴哉然則謝病去者乃其高致也博曰道合則服從不可則去天祥之有

### 詔收富民護持鹽書

帝語臺臣曰聞江南富民侵佔民田致貧者流徙鄉等亦聞之否對曰富民多乞護持鹽書依倚以欺貧民官府不能詰治宜悉追收為便命行之毋越三日

二月帝有疾○三月赦○西南夷俱叛遣陝西行省平章政事伊蘇岱爾等討平之免劉深等官

烏撒烏蒙東川芒部及武定成楚普安諸蠻因蛇節之亂皆以供輸煩勞為辭乘釁起兵攻掠州縣焚燒

僅若遣伊蘇岱爾等將兵會劉國桀紂之時國保方  
討順元蠻不及來會伊蘇塞爾等率師分道並進次  
第平  
之

### 夏四月帝如上都○五月太廟寢殿災

發明

天火曰災災及太廟之寢殿大變也元人守  
獲不嚴而使非常之火延及太廟其怠慢不

恭何其甚乎雖然變不虛生災不妄作有如斯之  
人事然後可名如斯之災異豈有人有不感而天  
變罔應者耶此皆非常之變有非人力所可勝者  
縱使守護之嚴安能制天之災變也雖春秋新宮  
災三日哭元之君臣絕無惕厲何謬如之此  
元之所以終于不振安能挽回天變也哉

### 六月朔日食

太史院失於推  
笑詔議其罪

秋九月龍興民訛言括童男女

至有殺其子者命捕為  
首者三人誅之始息

發明

漢哀之時書聞東民訛言行籌君子以志當  
時之不祥蓋訛言雖非真有然固有訛言亦

不祥之兆也此皆人心惶惑是以妖氣乘之易於  
恐動爾安有皇風清穆治教休明而尚有所謂訛  
言者乎上書日食則天變為之既形此書訛言而  
人心為之恐懼天人感應如此成宗悖罔而不察  
亦誤矣

冬十月帝還大都

癸卯七年春二月以阿喇卜丹茂巴爾斯並理平章政事

○汰諸司冗員

定中書省自左右丞相而下平章政事二員左右丞各一員參知政事二員定為八府

三月遣使巡行天下

罷贓污官吏屬八千四百七十三人審免獄三千一百七十六事

劉國傑敗宋隆濟及蛇節於墨特川擒斬之

初國傑師出播州境與賊遇戰失利及令軍士人持一盾布釘其上俟陣合即棄盾佯走賊果逐之馬遇盾皆仆國傑鼓譟趣之賊大敗既而餘寇復合要戰國傑不應數日命楊賽音布哈分兵先進大軍繼之

賊兵潰乘勝逐北千里殺獲無算遂破之於墨特川擒斬蛇節隆濟遁去尋為兄子宋阿重執之來獻詔斬之餘黨相繼平

### 廣義

嗚呼人徒知國傑之斬隆濟蛇節為勝而不知其勝者乃所以為負也蓋隆濟蛇節乃窮荒未裔之小醜得之不足以為喜失之不足以為憂况其道路隘塞水土異宜十人而供一兵亦云未足其費可勝言也今而得斬隆濟蛇節為幸而元人之所以自斬者亦多矣觀者以意逆志可也

### 復以特爾格為平章政事

特爾格乞解機務詔仍以平章議中書省事時諸王朝見未有典故者帝曰特爾格語之凡賜予諸王禮節悉命掌執至是復以為平章政事

鄂勒哲及巴延等坐賊巴延等免官鄂勒哲釋不問

初朱清張瑄徧以金帛結實近無不受其賂者事敗  
監察御史杜肯構言鄂勒哲等與二人交通宜罪之  
詔巴延密喇卜和卓梁德珪巴特瑪琳沁等戍邊丹  
津諤爾根薩里等罷職不叙籍其家惟鄂勒哲不報  
既而御史及樞密院臣復言中丞董士選亦嘗  
貸二家鈔為非義帝曰既云稱貸不必問也

發明

易曰九五訟元吉象曰訟元吉以中正也朱  
子傳曰陽剛中正以居尊位聽訟而得其平

者也中則聽不偏正則斷合理時鄂勒哲巴延俱  
坐賊罪免之俱免釋之俱釋今而已延等免官釋  
鄂勒哲不問則是聽訟不得其平而有徇情偏愛  
之弊矣又豈權衡之至公哉綱目書此詞繁而不

殺其義

可見

# 誅劉深罷雲南分省

時有司會赦議釋深罪哈喇哈斯曰微名首譽喪師辱國非常罪比不誅無以謝天下遂誅之

## 廣義

初劉深欲假征八百媳婦以立功自謂計之得矣今而功不能立誅不可免果何謂哉揆

厥所元由其始謀之不臧也書曰慎厥終惟其始君子戒焉

# 帝如上都○蘭谿處士金履祥卒

履祥少從學同郡王栢及何基之門二人蓋得朱熹之傳者宋將亡遂絕意進取屏居金華山中嘗以劉恕外紀記司馬氏通鑑以前事不本於經外繆不可信乃斷自尚書旁采子史損益之作通鑑前編他如論孟大學諸經傳及禮樂書各有注疏授其門人許謙以傳當時以為基之清介純實似尹和靖栢之高



明剛正似謝上蔡履祥則親得之二氏而並充於已者也居仁山之下學者因稱仁山先生至正中賜謚安文

發明

處士未嘗書卒者卒處士所以錄賢也履祥得朱子不傳之緒於遺經抱道自樂不求聞

達是蓋輕富貴於鴻毛而重道德於泰山者也故特書于冊以深予之

廣義

於履祥卒而地之書以處士者重道也

夏閏五月朔日食○右丞相鄂勒哲卒

廣義

鄂勒哲博果密等賢然因劉深之見以開西南夷之釁乃其所短也君子病焉

六月遣蒙古軍戍瓜沙二州

御史言瓜沙二州為邊鎮重地今大軍內屯甘州使  
官民反居邊外非宜乞以蒙古軍萬人分鎮二州險  
隘兼立屯田  
以供軍從之

### 秋七月都勒幹遣使乞降

都勒幹敗聚其屬及海都之子謀遣使請命使至伊  
徹察喇會諸王將帥議曰都勒幹乞降當待命於上  
然往返再閱月恐失事機乃使瑪古哈喇往報之既  
遣始聞帝嘉之詔慎飭軍士安置驛傳以俟自是諸  
王叛者相  
率來歸

### 兩浙大饑

平江等十五路霖雨害稼詔發粟賑民一月仍減直  
鬻米三十萬石協濟之時台州諸路旱饑尤甚行省

檄浙東元帥托歡徹爾賑之托歡徹爾殘虐不恤治  
中陳孚訴于宣撫使亟發廩民之殍者已十六七

發明

綱目饑歲多矣書于冊者十九而書大饑十  
成宗獨有其二何也是歲平江等十五路靈

雨而遽至于大饑者成宗為國務華去實舍本逐  
末軍旅頻興賦歛日急而不敦其內府庫竭矣農  
力耗矣天降饑饉亦無以賑恤萬民矣綱目所  
以獨兩書饑以示後世為國之不可不敦本也

以哈喇哈斯為右丞相阿固岱為左丞相○八月地震

平陽太原尤甚村堡移徙地裂成渠壞廬舍萬八百  
區人民壓死不可勝計詔問致災之由齊履謙言地  
為陰而主靜妻道臣道子道也三者失其道則地為  
之不寧弭之道大臣當反身責己去專制之威以  
答天變不可徒為祈禳也時帝寢疾宰臣及中人專  
政故履謙及之集賢學士陳天祥亦上書極陳陰陽

不和天地不位為時政之弊言尤切直執政者惡之  
抑不以聞天祥自被名起且一歲每以不得一見帝  
言鬱鬱不自釋  
尋復謝病歸

廣義

考之天祥自上書諫伐西南夷不報遂謝病  
歸以其諫不行也然被名而復起者猶望其

君之改也今因地震而猶極諫者非不知向之諫  
不行也蓋以臣子不忍一日而忘君父也至此復  
謝病歸者知其諫之終不可行也噫天祥之事成  
宗可謂曲盡其心者矣觀者勿以馮婦目之庶有  
以得天祥之志

九月帝還大都○復以茂巴爾斯為平章政事遣翰

林直學士王約使高麗徵其臣吳祈入朝尋流之安西

距既復位厚斂淫刑國人羣愬于朝因得其國相吳  
祈專權離間上父子狀詔遣約諭之曰天地間至親  
者父子至重者君臣彼小人知自利寧肯為汝家國  
地邪距泣謝罪且請子諫還國奸人黨與悉從約治  
遂徵祈赴闕  
鞠之流安西

### 冬十月詔互遷行省官之久任者

時諸道奉使言行省官久任多與所  
隸編民聯姻殊為害政詔互還之

### 十二月彗出紫微垣

發明

成宗之世彗星三見于綱目前書彗星見次  
書彗出井入紫微垣此書出紫微垣綱目皆

存而不削者所以志當時君臣溺于豐亨之樂置  
天變於度外忽人言而不恤豈不深可哀哉是以

有天下國家者其亡其亡繫于苞桑而常存  
戒懼不可暫忽也反是天下欲治其可得哉

### 詔蒙古軍居山東河南者免戍甘肅

簽樞密院齊諾言蒙古軍在山東河南者戍甘肅動  
涉萬里每行必鬻田產甚或賣妻子戍者未歸代者  
當發困苦日甚今邊陲無事而虛殫兵力誠為非計  
乞以近甘肅之兵戍之而山東河南前戍者令有司  
為贖其田產  
妻子從之

### 詔翰林太使院官勿致仕

時詔內外官七十者並聽致仕猶郭守敬以先朝舊  
德朝政多謬之累請謝事不許自是凡翰林太史官

不許致仕

著為令

廣義人臣四十始仕七十致仕此古今之通典也  
然則翰林史院雖曰密勿豈老荒之人所可

居耶勿許致仕者  
元人不經之失也

# 甲辰八年春正月地震

平陽尤甚民居摧毀皇后問平章政事阿錫葉曰災  
異如此殆下民所自致即對曰天地示警民何與焉

## 發明

綱目書地震五十九而成宋之世則有五焉  
地道陰而主靜妻道臣道子道也三者若無

道則地為之不寧盜陰陽不和之地不便時政之

莫明于此者齊履謙陳天祥言之于前阿錫葉

言之於後皆論之切直深合至理成宗忽而不悟  
悅而不從豈足謂順變之道哉君子脩書于冊則

其深罪當時垂戒

後世之意可見矣

二月帝如上都○增置國子生

初增蒙古生百員至是增置二百員選宿衛大臣子孫充之尋復分教於上都

夏五月朔日食○秋九月帝還大都○復巴延等官以

阿里為平章政事

御史杜肯構等言巴延等樹黨受財謫戍遠方道路相慶方經數月遽開召復相位又與原鞫之人列坐朝堂天下皆目巴延梁德珪巴特瑪琳沁為三凶三凶不誅無以謝天下况密喇卜和卓阿里等與之同惡相濟濁亂朝綱是以比年災異屢見雖朝廷存恤之詔累頒而禍亂之源未塞上失其政民受其殃乞將羣凶或斥或誅明正其罪御史中丞何通亦以為言前後革數十上皆不報



發明

前書巴延等俱坐贓免官則是巴延貪婪之罪不可赦也夫巴延貪婪既不能討按罪行

辟又不能誅卒復巴延官鄂勒哲不問成宗繆政如此曾不自知修省然則書復巴延等官不知前日免之也何為而免今日復之也何為而復參考觀之義自見矣

冬十月立哈尚為懷寧王

乙巳九年春二月建天壽萬寧寺

寺中塑秘密佛多象醜怪皇后幸寺見之惡焉以帕降其面而過尋勅毀之

發明

易曰王假有廟致孝享也此言為國者不可不立宗廟以祀其先經曰春秋祭祀以時思

之此言為國者不可不時享以致其敬是故宗廟書成則罪其慢世祖之時曾毀宋宮為佛寺成宗

建天壽萬寧寺此豈父作子述之義乎以有用之財建元益之刹其心獨無愧恥乎成宗之謫佛極其誠敬宜乎佛為之祐而享喬松之壽也不二年而崩殂敬佛延年反更促壽佛不足信亦可知矣後之人君欲崇尚浮屠者可不知所鑒哉

三月帝如上都○隕霜殺桑

般陽益都河間諸路凡殺桑二百四十一萬七千餘本

癸明

僖三十三年冬經書隕霜不殺草胡氏以為宜殺而不殺天失其道草木猶干犯之此蓋

君弱臣強之象定元年冬十月經書隕霜殺菽穀梁以為未可以殺而殺舉重可殺而不殺舉輕其象則刑罰不中之應時當三月序屬暮春按禮月令鳴鳩拂其羽戴勝降于桑霜不可以降桑不可

以殺今而隕霜殺柔四十餘萬則是陰陽失常而  
下干上之證也後二年成晏駕諸王爭立國祚宗  
幾危則其應豈不明且切歟綱目書此不言事應  
而事變其存欲使後之人君保天明命不敢縱逸  
爾云

## 夏四月大同地震

有聲如雷壞官民廬舍五  
千餘間壓死二千餘人

## 始定郊祀禮

元初代有拜天之禮然皆徇用國俗郊祀之事自平  
金宋後猶未舉行至是哈喇哈斯等言祈天保民之  
事有天子親祀者三曰天曰祖宗曰社稷而祭天尤  
國之大事也陛下雖未及親祀宜如宗廟社稷歲時

遣官攝行之制下翰林集賢太常及中書議之以為周禮冬至圜丘禮天夏至方丘禮地西漢元始間始合祭天地歷東漢至宋千有餘年分祭合祭迄無定議然時既不同禮樂亦異王莽之制何可法也今當循三代之典祀天南郊而方丘之禮績議以間又按周作壇壝三成近伐壇西成以廣天文從祀之位今宜去其一成以合陽奇之數每成高八尺一寸以合乾之九九壇設丙巳之地以就陽位又古者器用陶匏席用藁鞞以祀天漢唐而後禮樂玉帛日益繁縟宋金多循唐禮今欲修嚴非草創所能備舉宜取唐制損益而行之既而太常復議尊祖配天之議首臣曰自古漢人有天下率尊祖以配天宗廟已有時享郊止祭天為宜中丞何瑋曰嚴父配天不易之制也不從

### 廣義

抑考蒙古自宋理宗淳祐六年其得國為定宗貴由元年至宋度宗咸淳七年蒙古改國

號由元故自貴內至改號凡二十四年又自改號至此凡三十四年通計自貴由元年至此則元之有國以來此五十八年矣至是始定郊祀禮者以見前此皆苟且其禮而未嘗有以定之也嗚呼於天猶且慢之則其亂倫噴理也宜矣後人可不鑒哉

六月立子德壽為皇太子○秋七月命兄子阿裕爾巴里巴特喇居懷州

達爾瑪巴拉次子哈尚母弟也

以丹津巴特瑪琳泌為平章政事○八月給曲阜林廟灑掃戶

以尚珍署日五  
十項供歲祀

發明

成宗即位以來制作紛紜未盡合禮獨給曲阜林廟灑埽戶一節出人意表可見天理之

在人心有不可得而泯沒者於此  
為益見矣大書特書深予之也

### 賈人獻寶珠

西域賈人有獻珍寶求售者議以六十萬錠貯其直  
省臣有謂左丞尚文者曰此所謂惟庫特珠也六十  
萬錠之不為過矣文問何所用之答曰含之可不渴  
燮南可使目有光文曰一人含之十萬人渴則誠  
寶也若一寶止濟一人則用已微矣吾之所謂寶者  
米粟是也有之則百姓安無則天下亂以功用較之  
豈不愈  
於彼乎

發明

天變迭見災異頻仍此正憂勤惕為不遑寧處之時也而賈人首獻寶珠大書于刑則成

宗之志為已先矣今天世有好飲之人或因人言或自警者知其有傷生敗德之事強自禁止若將終身不復飲者然未幾口垂涎而心燥渴又復肆飲不至於沈湎沒身而不止成宗之失不幸類是綱目書此則亦末如之何也已豈不深可戒哉深可惜哉與唐時裴均進銀匙同意

九月帝還大都○冬十二月太子德壽卒

丙午十年春正月罷江南白雲宗都僧錄司

汰其民歸州縣各寺田悉令輸租初南臺御史言江南寺觀田畝歷年詔免租賦止虧公額下侵民利其所錄民戶或罹饑窘為其徒者坐視不卹乞於秋成之時驗其頃畝減半徵之以備凶歲推賑其民庶幾

利害稍均不加費  
於官府也從之

廣義

嗚呼世之願治者孰不以三代之盛望之殊不知三代之時未嘗有蠹政害民之事也其

養民者惟聞其五十而貢七十而助百畝而徹是也其他未聞焉其教民者惟聞其校以教民庠以養民序以習射是也其他亦未聞焉降自東漢唐宋以及元代緇黃塞道髡禿盈途蠹政害民莫此為甚間有君臣圖治動以三代之盛期之者不惟不知其未而且崇長蠹政害民之事是猶欲稼之盛而不去其螟螣蠹賊也其可乎哉大書曰春正月飛江南白雲宗都僧錄司者亦為元人一時之

辛也

閏月以徹爾阿薩爾為平章政事○二月帝如上都



夏五月遣高麗王諫還國復置征東行省

高麗王昨既卒遂遣諫還仍置行省鎮撫之諫尋更名章

秋八月開城地震

先是晉寧冀寧及諸郡地數震至是開城又大震壞王宮及官民廬舍壓死五千餘人

冬十一月帝還大都十二月有疾

丁未十一年春正月安西王阿南達及諸王莽賚特穆爾

入朝

帝崩

廟號成宗國語稱鄂勒哲圖皇帝史臣曰帝承天下混一之後善於守成惟其末年連歲寢疾國家政事內則決於宮閭外則委於大臣其所以不至廢墜者則以去世祖未遠成憲具在故也

左丞相阿固岱等謀奉皇后臨朝以安西王攝政右丞相哈喇哈斯遣使迎懷寧王哈尚於漢北及第阿裕爾巴里巴特喇於懷州

后以已嘗謀出阿裕爾巴里巴特喇及其母居於懷州恐其兄懷寧王立必報前怨乃命名安西王入京師欲立之而左丞相阿固岱平章賽音諤德齊巴特瑪林心巴延及諸王莽賽特穆爾陰謀斷哈尚歸路奉皇后垂簾聽政立安西王輔之於是阿固岱以祔廟及攝位事集廷臣議之太常卿田忠良博士張昇

曰制祔廟必書嗣皇帝名今將何書而御史中丞何瑋亦執不可阿固岱變色曰制自天降耶公等不畏死敢沮大事瑋曰死畏不義爾苟死於義何畏議遂寢時右丞相哈喇哈斯收百司符印封府庫稱疾守宿掖門內旨日數至皆不聽衆欲害之未敢發懷寧王適遣康王托克托赴京師哈喇哈斯令急還報復遣使南迎阿裕爾巴里巴特喇於懷州

**發明**

是時成宗既崩儲嗣久闕懷寧王兄弟乃裕宗之子成宗之姪天理人心皆當迎立今皇后有宿憾阿固岱相與協謀則是皆助逆之人也苟非哈喇哈斯令急還報則亂臣賊子之邪謀遂矣綱自書此詞繁而不殺則其逆理之勢彰彰明矣然則小人之禍可勝言哉

二月阿裕爾巴里巴特喇至大都誅阿固岱等執阿南

# 達歸於上都

哈喇哈所使至懷州阿裕爾巴里巴特喇疑未行傳李孟曰支子不嗣世祖之典訓也今宮車晏駕大太子遠在萬里殿下當急還宮廷以安人心阿裕爾巴里巴特喇奉其母還大都先遣孟趨哈喇哈斯覘之適后使問疾哈喇哈斯所孟入長揖引其手診之衆謂孟醫也竟不疑既而知安西之變有日還報曰事急矣不可不早圖之阿裕爾巴里巴特喇曰以卜決之孟名卜者謂曰大事待汝而決第云其吉及入筮果吉孟曰筮不違人是為大同阿裕爾巴里巴特喇喜振袖起衆翼之上馬諸臣皆步從入哭盡哀復出居舊邸安西之黨見阿裕爾巴里巴特喇至遂謀以三月三日為賀其生辰因以舉事者哈喇哈斯許之夜遣告阿裕爾巴里巴特喇曰懷寧王遠不能猝至恐變生不測當先事而發阿裕爾巴里巴特喇遣都

萬戶囊嘉特詣諸王圖喇定計囊嘉特力贊之乃先  
二日率衛士入內稱懷寧王遣使召安西計事至即  
并諸王莽賽特穆爾執之械送上都誅阿固岱巴特  
瑪琳沁賽音誇德齊巴延諸王庫庫伊克圖進曰今  
罪人斯得太子實世祖之孫宜正大位阿裕爾巴  
巴特喇曰惡人潛結宮壺亂我家法故誅之豈欲作  
成福以覲神施耶懷寧王吾兄也宜正大位已遣使  
表壘北迎之矣遂自監國與哈喇哈斯日夜居禁中  
以備變俾李孟參知政事孟損益庶務裁抑僥倖羣  
小多不樂既而曰執政大臣當自天子親用今鑿輿  
在道孟未見顏色誠不敢冒大  
任因辭弗許遂逃去不知所之

發明

直書四誅所以予其討有罪也阿裕爾巴里

巴特喇削平內難或勸即位力辭弗受權為  
監國以俟乃兄則其志亦可尚已同視剽輒之徒  
豈不大相懸絕哉故特表而出之所以深予之耳

廣義

阿裕爾巴里巴特喇誠剛明正大人也觀其拒伊克圖之言非見得思義者能之乎其視

乘時射利者遠矣况乎其傳李孟不肯專任而邊  
爾逃去又其慮事之深者也无世而有斯人可尚

也

夏五月懷寧王哈尚至上都廢皇后巴約特氏居東安

殺之誅安西王阿南達及諸王莽賚特穆爾遂即位大

赦

哈尚聞帝崩自阿勒台山至和林諸王勲威合詞勸  
進王曰吾母及弟在大都俟宗親畢會議之阿裕爾  
巴里巴特喇既平內亂母鴻吉哩妃惑於日者言欲  
哈尚讓位阿裕爾巴里巴特喇哈尚聞之語喀喇托

克托曰我久在邊陲又係次居長星命之言茫昧難信設我即位後所行上合天心下副民望則雖一日之短亦足垂名萬年何可以陰陽家言而乖祖宗之託哉此殆用事之臣擅權專殺恐他日或治其罪故為是奸謀爾汝為我往察事機疾歸報我乃親率大軍由西道諸王昂輝由中道絳和爾由東道各以勁卒一萬從而遲迴不進托克托至大都入道哈尚言妃愕然曰修短之說雖出術家為太子周思遠慮乃我深愛令貪慾已除宗王大議已已定太子不速來何為汝所致言殆有讒間汝歸為我彌縫之而趣其來先是妃以哈尚不至復遣阿實克布哈迎之道安西謀變始未及太弟監國與諸王羣臣推戴之意時托克托復徃行至中道哈尚與中望見之趣使同載托克托述妃言哈尚大感悟以阿實克布哈為平章政事遣還報兩宮阿格爾巴里巴特喇侍其母來會于上都哈尚遂即位

發明

廢不宜廢也教不宜殺也巴約特氏成宗之後懷寧之孀后雖有順從叛逆之謀然不過

誅其同謀足矣以臣而廢君以姪而殺孀三綱則未正也人心則未安也故書廢書殺以罪之至若安西王等共謀不軌其惡已萌故書誅以正其悖逆之罪耳既而內難甫平即位肆赦所以予其當立也綱目有以斷斯獄矣

追尊考曰順宗皇帝尊母鴻吉哩氏為皇太后○加哈喇哈斯托多爾海太傅阿實克布哈太尉○以塔喇海為左丞相綽和爾奇塔特布濟克莽賚布哈並平章政事○六月立弟阿裕爾巴里巴特喇為皇太子○詔定



# 祔廟之次

哈喇哈斯等言與翰林太常議皇考大行皇帝母兄也二帝神主依兄弟之次祔廟為宜擬謚皇考曰昭聖行孝皇帝廟號順宗大行皇帝曰欽明廣孝皇帝廟號成宗升祔太廟太祖居中睿宗西第一世祖第二裕宗第三順宗東第一成宗第二先兄妃鴻吉哩氏宜謚貞慈靜懿皇后祔成宗廟制曰可史臣曰夫睿宗裕宗順宗皆未嘗居天子之位但當祔食於其所出之帝而各為立廟已非禮矣況成宗為君時順宗為之臣豈有依次升祔而躋順宗於成宗之上者乎夫禮之中又失禮焉哈喇哈斯何瑋諸臣何能逃其責乎

## 發明

追尊祖考皆有常典悖禮則過中夫禮則不及要當求合於中道而已睿裕順三宗未嘗

南面而稱尊不過追尊之為帝耳成宗雖弟君也順宗雖兄臣也以順宗而居成宗之上則是以臣而居君之上以君而居臣之下失禮甚矣為元之計者但當食於其所出之帝於禮頗安於義斯正今而各為立廟豈禮也哉嗚呼追尊立廟本為孝誠而元人失所以尊崇之道欲孝其親而反為不孝也惡在其能尊崇耶綱目但書詔定祔廟之次而不書其所以詔定之故則其不滿當時之意為可見矣

以綽和爾布呼齊並為平章政事○秋七月封圖喇為越王左遷右丞相哈喇哈斯為和林左丞相以伊徹察喇為和林右丞相進爵淇陽王

初皇太子入定內難阿固岱有勇力人莫能進圖喇實手縛之以功封越王哈喇哈斯力爭以為舊制非親王不得加一字之封圖喇疏屬豈可以一日之功易萬世之制帝不聽圖喇因譖于帝曰安西謀于大統時丞相亦嘗署其贖由是罷為和林行省左丞相仍太傅復錄軍國重事哈喇哈斯至鎮斬為盜者一人分遣使者賑貸降民奏出鈔帛易牛羊以給之近水者教取魚鼈為食命諸部置傳車相去各三百里凡十傳轉米數為石以餉饑民又度地置倉廩積粟以待來者求古渠浚之溉田數千頃治梅海屯田令部民雜耕其間歲得米二十餘萬北邊大治

### 發明

按劉氏書法左遷之詞三左遷某為某官無罪之詞也某人以罪左遷有罪之詞也某人

左遷薄乎云爾之詞也武宗德圖喇手縛阿固岱之功不顧親疎加以王爵則是徇恩私而亂祖法

矣哈喇哈斯力爭不可乃為左遷是豈納諫聽言之義乎毋作聰明以亂舊章今封圖喇為王則是亂祖宗之舊章失禮之中又失禮焉故詳書譏之

以塔喇海為右丞相塔斯布哈為左丞相塔斯哈雅嘉  
琿帕哈哩鼎拜布哈並平章政事○制加孔子號曰大成

制曰先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也可加大成至聖文宣王遣使闕里祀以大牢於戲父子之親君臣之義永為聖教之遵天地之大日月之明奚罄名言  
之妙尚資神化祚我皇元

發明

孟子曰伯夷聖之清者也伊尹聖之任者也柳下惠聖之和者也孔子聖之時者也孔子

之謂集大成大成也者全聲而玉振之者也今

武宗嗣位加號大成此蓋發前王未發之緒不亦

美乎天札一頌吾道爭氣紛紜制作獨此為先是

以元起沙漠入主中華而綿延於百年之久者其

精神命脉豈不在於茲

哉直書于冊深予之也

廣義

嗚呼歷代加吾夫子之尊號者至元武宗可謂至矣盡矣不可以有加矣後有欲尊吾夫

子者殆恐不及元

人此舉之為當也

以都指揮使茂穆蘇及伶官實迪等並為平章政事

茂穆蘇角觥屢勝廷授平章政事實迪等授平章仍留玉宸樂院使未幾樂工有犯法者刑部逮之實迪

等以王宸與刑部侍郎皆三品官皆榮祿大夫留不遣中書以聞帝曰凡諸司視其資級授之散官不可越其間冗職名官高者宜道舊制降之

發明

五代時唐以伶人陳俊儲德源為刺史君子譏之夫以伶人賤工不學無術唐以為刺史尚猶不可况平章執政之官又豈伶官之所宜任乎蓋賢者任于伶官古亦有之未聞用伶人為平章者也揭而書之所以志武宗荒逸之本

## 八月停內降旨選官

省臣言內降旨與官者八百八十餘人已除三百未除者猶五百餘請自今越者皆乞勿與又外任官多帶相銜非制御史臺臣亦言御史廉訪司官宜從本臺公選不當從諸臣所請降內旨用之帝曰若此者

卿等皆當執勿與未幾省臣復言比有應入常調者或未入仕及已嘗廢黜者亦復請自內降已嘗奉詔禁革之後所降內旨復有百餘臣等竊謂中書政務他人輒得干請如此責效實難自今銓選錢穀之事不由中書議者不得奏聞從之

## 賜諸王孝經

中書右丞博囉特穆爾以國字譯孝經進詔曰此孔子微言王公庶民皆當由是而行命刻板模印諸王以下咸錫之

**廣義** 賜諸王孝經者歷代未嘗見諸史冊也元人此舉深得以孝治天下之旨特書于冊美可

知矣

以塔爾海為平章政事○九月帝至自上都○冬十月  
命皇太子領中書令

省臣言初置中書省時裕宗為皇太子嘗至省署敕  
行中書令事後僧格遷立尚書省不四載而罷今復  
建中書於舊省乞從中書令位  
請皇太子入省一蒞之制可

### 十二月山東饑

遣禮部尚書吳鼎往賑之時議發米四萬石不給則  
以鈔折之鼎曰民得鈔將何從易米請於朝易米以  
行

徵處士蕭輦為太子右諭德



軒陝西奉元人初出為府史語當道不合即引退力學三十年不求進鄉人有暮行遇盜詭曰我蕭先生也盜驚愕釋去世祖時辟為陝西儒學提舉不赴後累校集賢直學士國子司業改集賢侍講學士皆不赴至是徵拜太子右諭德扶病至京即入覲東宮書酒誥為獻以朝廷時尚酒也尋以病請解職或問之則曰禮東宮東西面師傳西面此禮今可行乎俄擢集賢學士國子祭酒依前右諭德疾作固辭而歸卒謚

貞敏

發明

凡徵處士不起者則書不至受職而復還者則書尋辭歸或書尋遣歸此通例也今蕭軒

累徵不起及至而以病辭歸此何以不書辭歸而直書為太子右諭德若直任于朝者是蓋不滿之意也軒既不欲仕則亦已矣况前累召不起今而扶病至京何耶原其心不過向之辟為儒學提舉

未親君也後之授為國子司業亦未親君也迨至太子諭德則志得意滿雖疾不辭奈何禮貌既衰疾作解職又豈誠於恬退者比哉故綱目削去其辭歸之實其不滿之意為可見耳

戊申武宗皇帝至大元年春正月以阿寶克布哈為右丞

相行御史大夫事

初阿寶克布哈見帝容日悴乘間進曰陛下八珍之味不知御萬金之身不知愛而惟麋蕪是耽妃嬪是好是猶兩斧伐孤樹未有不顛仆者陛下縱不自愛獨不思祖宗付託之重天下仰望之切乎帝大悅曰非卿孰為朕言因命進酒阿寶克布哈頓首謝曰臣欲陛下節飲而反勸之是臣之言不信於陛下也臣不敢奉詔左右皆賀帝得直臣遂授右丞相行御史大夫事尋以太子請復入中書既又賜爵康國公

廣義

武宗即位之初而首得直臣如此宜有以善其終矣然而享國不永者不可獨委諸天也

乃說而不釋  
之所致歟

## 兩浙饑

民饑者四十六萬戶死者甚衆詔戶月給米六斗以沒入未瑄張瑄財產賑之時浙東宣慰同知托歡徹爾議行勸貸令敝富民錢百五十餘萬以二十餘萬屬寧海縣簿胡長孺藏之長孺察其有乾沒意悉散于民既而果索其錢長孺抱成案進

曰錢在是托歡徹爾雖怒不敢問

發明

武宗即位未踰晷而饑饉之事兩見細目前書山東饑此書兩浙饑分注雖各載其賑濟

之實然而卒無益于飢荒者由其內不蓄而倉廩竭外不正而災異生徒以左枝右梧而行姑息又

何益於饑荒也哉後之人居要當竅本抑末毋徒委之于天數也嗚呼綱目垂戒之意切矣

### 西僧毆上都留守李璧釋不問

西番僧之在上都者強市氏薪民訴于壁壁方詢其由僧已率其黨持白梃突入公府隅案引壁髮猝詣地捶扑交下拽歸閉諸空室久乃得脫奔訴于朝僧竟遇赦免未幾其徒恭噶等與諸王哈喇巴爾妃爭道拉妃墮車毆之語侵上事聞亦釋不問時宣政院方奉旨言毆西僧者斷其手詈者戒其舌皇太子聞之亟上言此法昔所未言遂寢其令

#### 發明

嗚呼上都留守而為西僧所毆則其有愧是名亦多矣雖然西僧之所以強橫者由上之

人縱之有素也僧毆留守置之不問天下之事安有大於此者乎反有斷手截舌之令豈禮也哉綱

日直書于冊一以見當時崇尚異端之極一以見當時威令不行之故噫元政乖刺如此此其所以國是日非而罔知禮義之道也

**廣義**

上都元人根本之地李壁上都留後之臣上都非鄙邑之可比李壁非具臣之可比朝廷

自宜待之厚而寵之異焉夫何比昵番僧縱其毆辱果何理哉且夫城之狐社之鼠人不加害者非畏狐鼠也畏乎藁城損社之獲罪也况壁為國大臣豈番僧可得而毆者耶今被其毆釋而不問其國法安在哉是宜後日番僧之徒得以再毆王妃也嗚呼歷代之寵異端未有若此之甚厥後嘉宄竊發妖人橫起實由是焉嗚呼西漢亡于外戚東漢亡于宦官唐亡于藩鎮宋沒于姦臣元敗于番僧然則敗亡之事雖衆而其機則同識者恨之

三月建興聖宮

為皇太后所居

帝如上都○以托克托穆爾為平章政事○夏四月罷

征東行省

高麗王章奏言陛下令臣還國復設行省國中比歲饑饉又以數百人仰食其土則民益不勝其困帝從

其請

罷之

六月隴西雲南地大震○加宦者李邦寧大司徒兼左

丞相

邦寧在宋為小黃門初從瀛國公入見世祖留給事  
內庭至是帝從以為江浙平章辭曰臣以闈腐餘命  
前朝赦而用之使承乏中涓今陛下復欲置臣宰輔  
臣聞宰輔者佐天子共治天下者也奈何辱以寺人  
陛下縱不臣惜如天下後世何誠不敢奉詔帝  
大悅加大司徒進授左丞相仍領太醫院事

**發明**

書加宦者李邦寧大司徒兼左丞相文無貶  
詞然以一宦者而居六卿之職又兼左揆之

任則元室之卑從可知矣貽是禍者非武宗乎分  
注載邦寧所辭之言可謂能守其分者武宗聞之

獨無

愧哉

**廣義**

嗚呼漢之將亡也天子呼宦官為父母唐之  
將亡也宦官目天子為門生宋將亡而封宦

者為大王元將亡而封宦者為丞相濁亂綱常未  
有若此之甚也不有豪傑起而一之則天理民彝

孰從而正之哉天  
道好還無足怪也

# 秋七月皇子和實拉請括河南田止之

和實拉請立總管府括河南歸德汝寧潁河荒地歲  
求其租中書言潁河之地出沒無常近有齊默格者  
妄稱省中委之括地以有主之田指為荒地所至騷  
動被害之民相率來愬方議其罪遇赦獲免今乃妄  
以其地獻于皇子且河南遠歲凶荒脫從  
所請為害非細帝曰安用多言其止勿行

# 築呼鷹臺於朔州

初改鷹坊為仁厚院秋正二品命右丞相托克托  
等為院使領其事至是築呼鷹臺於朔州澤中

# 發明

築呼鷹臺何以書所以志其荒縱之失也蓋  
王者不寶遠物則遠人格所寶惟賢則通人



安外作禽荒先王大戒以萬乘之君務鷹隼之  
好又烏足以貽厥孫謀也哉故直書以深譏之

以塔斯布哈為右丞相奇塔特布濟克為左丞相

詔內外機務並從中書區處諸王公主駙馬母沮撓  
之近侍官屬及內外諸司事非由中書議者毋隔越  
奏聞

## 八月諸路水旱蝗

江淮民采草根樹皮為食而河南山東有父食其子  
者詔凡遣使賑貸之處差稅並蠲除之既而省臣言  
夏秋之間鞏昌地震歸德暴風濟寧泰安真定大水  
民居蕩析江浙饑荒之餘疫癘大作死者相枕藉父  
鬻其子夫離其妻哭聲震野所不忍聞是皆臣等不  
才猥當大任以致政事乖違陰陽失序願退位以避

賢路帝曰災害事有由來非爾等所致也但當慎所行爾

**發明**

武宗即位僅踰暮而兩書饑一書地震而此書諸路水旱蝗則帝之世災異之多甚矣當是時政事舛錯賢否混淆君日驕而臣日諂是以災異迭形每相告戒惜乎武宗蔽錮已深終莫能悟惟知自樂而不知憂民惟知自侈而不知憂天徒使當世之民溺於塗炭悲夫綱目一書再書不一而足所以深罪武宗而垂訓來世也噫

**廣義**

大抵上天之心於人君無所不受故示以災眚者欲其修省也迨其恬不知省然後別置厥德而用集大命焉今觀武宗曰災害事有由來非爾等所致但當慎所行耳然謂之慎所行者亦不知其慎所行者何事也其自誣如此天將何以祐之耶欲享國長久得乎

九月帝還大都○冬十月以西僧嘉勒幹巴勒為翰林

### 學士承旨

發明

賢者在位能者在職國家閒暇及是時明其政刑此固治國之急務也翰林乃文學淵藪

之地必才德俱優者方可任之當時之才德俱優  
屈於才僚者不少武宗不之拔擢而乃以西僧為  
之乎蓋異端難與論正道釋氏不可授儒官自有  
書契以來未聞以僧為翰林學士者武宗酷信西  
僧前歐留守而不問此為學士而不疑豈不貽笑  
於天下哉流品混淆名器顛倒其如治國何綱目  
特揭而書之于冊者所  
以深譏其名器之濫也

廣義

嗚呼以文苑清高之地而居一虛無寂滅之  
縉流尚何足以言倫理哉揭之于冊其失自

見

十一月省臣請汰冗官節財用

省臣言世祖時自中書以下諸司官有定員邇者諸司遞陞一級一司多至二三十員事不改舊而官日增乞如大德十年員數冗濫悉汰之又今中都築城大都建寺及為諸貴近營造私第軍民困弊廩藏空虛而用度日廣每賜一人動至鉅萬恐至不繼宜暫節縮况百司之事每於中書有干預者乞申禁之帝曰嘗令諸人毋干中書之政他日或有乘朕忽忘持內降文記至中書者其執之以來

禁賈人乘驛

時有進沉檀異木可構宮室者勅江浙行省驛致之中書省臣言西域賈人佩虎符馳驛馬名奉勅求珍

異乃或以一豹上獻亦要四賜虎符國之信器驛馬使臣所需畀之商賈誠非所宜既又言江浙諸驛半歲之間使人過者千二百有餘桑烏保赫昂等進獅豹鴉鷓數日食肉千餘斤自今有來獻者乞令自備資力從之

### 廣義

孔子曰上有好者下必有甚焉昔武王即位之初西旅貢獒召公以為非所當受作書致

告夫以一獒之貢受之若可以無害誠以人君玩物之心一萌則下之窺其所好者蓋將技間抵隙而無所不至矣老氏曰圖難於其易為天於其細者此也今武宗甫爾即位兩浙遂饑縱僧毆臣寵任宦者諸路水旱蝗災呼鷹臺其間無一善政惟務珍禽奇獸寶玉是玩遂使賈人乘驛貢獻滿途噫自古人君溺於玩物者未有甚於武宗也彼省臣所謂乞令自備資力者是猶或紛其兄之臂子

謂之姑徐徐

云爾何益

以奇塔特布濟克為右丞相托克托為左丞相○覈天

下屯田

中書言天下屯田一百二十餘處由所用非人多致廢弛除四川甘州應昌雲南為地遼遠餘當選習農務者往覈其可興者興可廢者廢詔從之

閏月太傅哈喇哈斯卒

謚忠獻

詔有司贖饑民所鬻子女

發明

贖饑民所鬻子女何以書所以予其仁民之心也雖然君無積蓄以養民而使民有菜色

鬻其子女武宗之心寧無愧乎然既能贖而歸之則又非愀然不顧者之比故又進而予之所以嘉

其一念之善耳吁可嘆哉

以齊勒特穆爾為平章政事○伊徹察喇進攻徹伯

爾諸部漠北悉平

伊徹察喇言徹伯爾諸王之在邊境者素無悛心儻諸部合謀必為國患請撫安都勒斡子庫春及處諸部來歸者於金山之陽遣軍屯田山北脫彼有謀吾已擣其腹心矣帝稱善趣進軍攻之徹伯爾等果欲奔軍春不納遂相率來降漠北悉平

# 左遷敬儼為兩淮轉運使

時儼為江南治書侍御史以議立尚書省不便忤宰  
臣意適兩淮鹽法久滯乃左遷儼為轉運使欲臨之  
儼至黜貪理敝課復增羨至一十五萬引河南省臣  
來會監笑欲以所增羨為歲入常額儼以民罷已甚  
以羨為額病民以  
為已不可遂止

己酉 二年春正月越王圖喇有罪賜死

圖喇居常怏怏有怨望意去年秋帝幸涼亭將御舟  
圖喇前止之言涉不遜帝由是銜之及宴萬歲山圖  
喇醉起解腰帶擲地瞋目謂帝曰爾與我者止  
此耳帝疑其有異志命省臣鞠之辭服遂誅之

## 發明

按劉氏書法賜死之例有四者所坐賜死有  
罪者也書貶某賜死書賜某死皆可罪而未



宜死者也直書其有罪賜死宜死者也有所坐者也  
武宗不顧親疎即加王爵而圖喇居常怒望將謀  
不執此置小人之心得此欲被不自滿足之意也  
便武宗苟能知此安有今日之患乎故直書之以  
正其  
罪

## 始親享太廟

以受尊號告謝太  
廟為親享之始

### 廣義

祖宗之享豈可使人為之書曰始親享者以  
見自此以前皆使人攝之也噫尊祖敬宗之

禮於此知  
所重矣

## 追還內降璽書

丞相塔斯布哈等言朝廷璽書不由中書徑令翰林  
頒給者自大德六年至今凡六千三百餘道皆于土  
田戶口錢穀銓選獄訟害民妨政之事請  
悉追奪後凡不由中書者乞勿與之制可

### 帝如上都

御史言京師之內工役繁興加之歲旱民飢狂愚易  
惑今乘輿行幸乞命丞相一人留守京師著為令從  
之

### 夏六月復徵僧道賦稅

從省臣  
言也

### 秋七月河決歸德又決封邱

發明

嗚呼當時河決之害亦多矣是豈當時隄防之不固歟抑亦當時氣數之使然歟曰非也

蓋隄防傳襲既久至是而決則非不固可見河道相因數世至是而決則非氣數可知是乃陰陽失常不能自固而實天變之所致也豈可委之隄防氣數之未乎苟以隄防氣數為言則人君親為泛常將何所警懼也哉

八月復置尚書省以竒塔特布濟克為右丞相托克托為左丞相三寶努約蘇為平章政事保巴為右丞孟克特穆爾為左丞王巖參知政事

初帝從托克托嘉理帕哈哩鼎言欲復置尚書省分理財用御史臺臣言昔年阿哈瑪特僧裕相繼立尚

書省綜理財用事敗併入中書今四方地震水災歲仍不登百姓重困又復立之則必增置有司濫設官吏殆非益民之事且綜理財用在人為之若止命申書未見不可帝四卿言良是此二人者願任其事姑聽其行焉至是約蘇又與保巴言其事帝命與塔斯布哈集議保巴言政事得失皆前日中書所為今欲舉正彼懼有累孰願行者臣請乞舊事從中書新政從尚書尚書省官以奇塔特布濟克托克托為丞相三寶努約蘇為平章保巴為右丞王巖為參知政事帝並從之塔斯布哈言此大事遽爾更張乞與老臣更議之帝不從三寶努言尚書省既立更新庶政變易鈔法用官六十四員其中宿衛之士有之品秩未至者有之未歷仕者有之此皆素習於事既已任之乞勿拘例授以宣勅仍改各行中書省為行尚書省以尚書省條畫頒示天下敢有沮撓者罪之

發明書復置尚書省以明其不宜置也今所用之者皆一時之小人自是宵小用事變更制度

而天下由是多事矣故備書于冊以深譏之

廣義

此即王安石制置條例司耳奇塔特布濟克不以盧世榮僧格為鑒又踵其覆轍厥後自

取誅戮不亦宜乎

## 置太子右衛率府

命右丞相托克托御史大夫布琳尼敦領府事取河南蒙古軍萬人隸之王約曰左衛率府舊制有之今置右府何為諸少深思之不可以累儲宮也太子又命取安西兵器給宿衛士約謂詹事鄂勒哲口今移文十里取兵器人必驚疑主上聞之奈何鄂勒哲曰實慮不及此家今薛居言陝西分地五事命徃理之

約不為署行語之曰太子潛龍也當勿用之時為飛龍之事可乎遂止太子喜諭羣下曰事未經王彥博議者勿啓一日約方啓事二宦官侍側太子問曰自古宦官壞人家國有諸對曰宦官善惡皆有之但恐處置失宜耳太子深然其言

廣義

君子觀王約告仁宗之言可謂不負厥職者矣然而仁宗之善政屢見于史冊者謂非王約輔導於其始可乎若王約者貽仁宗之哲命者也

## 九月頒行至大銀鈔

帝從約蘇宮鈔法大壞乃改造至大銀鈔凡十三等每一兩准元鈔五貫白銀一兩黃金一錢隨路立平準行用庫及常平倉以權物價毋令沸騰元之鈔法至是凡三變云

# 帝還大都○始鑄錢

元行鈔法雖皆以錢為文而廢錢弗鑄至是始詔大都立資國院山東河東遼陽江淮湖廣四川立泉貨監六產銅之地設提舉司十九鑄錢曰至大通寶者每一文准銀鈔一釐曰大元通寶者准至大錢十文與歷代錢通用其當五當三折二折以舊數用之既而御史言至大銀鈔始行品日繁多民猶未悟而又兼行銅錢慮有相妨今民間拘收銅器甚急民殊不便乞與省臣詳議不報

## 復行內降旨

尚書省言三宮內降之旨曩中書奏請勿行臣等謂宜仍舊行之儻於大事有害則復奏請中書之務乞以盡歸臣等從之

# 冬十月以皇太子兼尚書令

初帝從奇瑤特布濟克言由尚書省任人以宣勅散  
官委之中書至是太子言舊制百官宣勅皆歸中書  
以臣為中書令故也自令物牒宜令  
尚書省給降宣命仍委中書從之

# 質江南富民子為軍

約蘇言江南平垂四十年其民止輸地稅餘皆無與  
富室有占編民奴役之地動輒百千家有多至萬家  
者其力可知乞令有司收糧五萬石以上者石輸二  
升于官仍質一子而軍之所輸之糧半入京師以養  
御史半留于彼以備凶年富國  
安民無善于此詔如其言行之

# 發明

語曰以不殺民戰是謂棄之武宗惑約蘇之  
言以江南子弟質之為軍則不惟欺其君而



抑且虐其民矣安有欺君虐民之臣尚  
可逭其誅戮乎直書于冊交譏之也

廣義

約蘇欲質江南富民子為軍者  
憂其為亂也其計不亦左乎

十一月八百媳婦諸蠻亂

八百媳婦及大小徹里諸蠻作亂詔遣雲南右丞索  
勒濟爾威往諭之比至為賊所賂復肆攻掠遂以敗  
還

以阿薩爾為尚書左丞相行中書平章政事

尋出商議遼

陽行省事

十二月帝親饗太廟

發明

易曰萃亨王假有廟祭義曰公假于太廟朱子曰廟所以聚祖考之精神又人必能聚己

之精神則可以至于廟而承祖考也然則王者親享太廟以己之精神聚祖考之精神則必親享而後河元世未嘗親享遣官代之則是矣萃聚之義而懷禮亦甚矣武宗能親享之此綱目所以特書之以予之也

庚辰三年春正月徵李孟入見以為平章政事同知樞密

院事

初孟既逃去有言于帝者曰內難初定時孟嘗勸皇太子自取帝弗之信一日太子侍內宴忽戚然改容帝曰吾弟何不樂太子從容起謝曰賴天地祖宗神靈神器有歸然成今日母子兄弟之歡者李道復之

功居多適思之不自知其變於色也帝即命搜訪之  
得於許昌陘山召見謂宰臣曰北皇祖妣命為朕賓  
師者宜速任之至是乃授中書平  
章事集賢大學士同知樞密院事

廣義

抑觀仁宗之起李孟可謂兩得矣一以釋  
武宗之疑一以全青宮之義仁宗其賢乎

立皇后鴻吉哩氏○二月寧王庫庫楚謀反流于高麗

庫庫楚與圖喇子喇特納實哩謀為不執事覺下庫  
庫楚獄竄喇特納實哩於漠此磔西僧特哩等二十  
四人於市遂欲誅庫庫楚乎章政事  
持爾格辨其誣紹釋之流于高麗

以約蘇為尚書左丞相○三月賜諸王徹伯爾幣帛

初世祖以海都叛詔積其分地五戶絲為幣帛俟其  
來降賜之至是其子徹伯爾來歸尚書省臣請以賜

之帝命省臣備述其故  
以與之使彼知所愧

發明

有功則賞雖讐不廢有罪則刑雖親不宥此  
固人君賞爵之至公也前者庫庫是謀反罪

狀甚明而僅流之於高麗徹伯爾海都之子叛不  
能誅乃賜幣帛此皆過於姑息而非奉天伐暴之  
意也昔管蔡流言周公誅之豈周公手刃同氣耶  
奉行天討不能順私思以廢公法耳今而謀反者  
僅流高麗悖逆者賜之幣帛而不知有功者將  
何所賞乎元之政刑如此又安能久享其國哉

帝如上都○夏五月詔尚書省右丞相托克托左丞相

三寶帑總百司庶務

尋加托克托太師爵義

國公三寶努爵楚國公

# 荆襄大水山崩

襄陽峽州路荆門州壞官民廨舍二萬一千八百餘間死者三千四百餘人

發明

詩云煜煜震電不寧不令百川沸騰山冢萃崩高岸為谷深谷為陵哀今之人胡惜莫懲

是時荆襄大水山崩死者三千四百人則其變之非小明矣元之君臣曾未見其宵旰不寧更相戒飭之意而徒上下偷安置之度外則其自暴自棄不足以為有為豈不明且切歟綱目書此其垂戒來世也亦大矣

廣義

上書詔尚書省右丞相托克托左丞相三寶努總百司庶務且以各封公爵繼書荆襄大

水山崩者所以著寵任興利之臣專權之應也天道福善福淫撓於影響可不畏哉可不戒哉

秋九月帝還大都○冬十月詔減宮人膳

尚書省言宣徽院廩給日增儲待雖廣亦不能  
給帝曰比見後宮飮膳與朕無異其覈實減之

詔大司農修明勸農之令○十一月始以太祖配享南郊

先是三寶努等言奉詔舉行郊祀典禮臣等議欲祀  
北郊必先南郊今歲冬至祀天園丘尊太祖皇帝配  
享來歲夏至祀方丘尊世祖皇帝  
配享至是有事南郊以太祖配享

廣義 武宗之政見諸史冊獨此可觀  
亦書曰始者以見前此未有也

殺大都留守鄭阿爾斯蘭

阿爾斯蘭襲父職為武衛都指揮使尚書省構其與兄榮祖等十七人圖為不執置獄鞠之並棄市籍其家中外  
冤之

發明

凡書殺殺無罪也阿爾斯蘭初無罪犯尚書省構其不執置獄阿爾斯蘭誣服即為棄市

然則果何罪哉前史皆以棄市書綱目變文直書曰殺所以明其無罪因以譏元之失政刑也安有無罪殺人而可以為民之父母乎故特不去其官

### 城中都

辛亥四年春正月帝崩

廟號武宗國語曰庫魯克皇帝史臣曰帝既然欲創治改法而有為故其封爵太濫賜賚太泛至元大德

之政於是稍  
有更變云

廣義

抑觀史臣之論武宗有曰帝慨然欲創治改法而有為故其封爵太濫賜賚太泛於戲此

豈善論武宗者哉且元人創治立法固為不善如其不善則當速改武宗慨然欲創治改法亦可謂

有為矣然為之不善不若不為之為愈焉彼武宗之時正守成之時也觀其創治改法不過寵任西

僧為丞相為翰林承旨封興利之臣托克托等為公築呼鷹臺縱僧毆上都留守李璧聽讒殺大都

留守鄭阿爾斯蘭其曰復置尚書省綜理財用即王安石制置條例司也其曰有進沈香異木可為

宮室者即命乘驛致之即宋徽宗土木宮室之費也然則所為之不善者抑亦孰有大於此類哉其

所得者惟聽阿寶克布哈之諫酒色聽省臣請太冗官節財用數天下屯田詔有司贖飢民所鬻子



女詔大司農修明勸農之令始以太祖配享南郊  
其所得者如是而已意所失者大而多所得者小  
而寡然爵及惡德費出不經謂之太濫太泛可乎  
史氏之論未為當也若曰元之武宗創治改法而  
有為臣未  
之信焉

皇太子罷尚書省誅托克托三寶努約蘇保巴王罷流  
孟克特穆爾于海南

皇太子以托克托等變亂舊章流毒百姓凡誤國者  
欲悉按誅之延慶使楊多爾濟諫曰為政而首尚殺  
非帝王治也太子感其言特誅其尤者既而御史言  
托克托等既正典刑而黨附之徒市在百司若博囉  
特穆爾奇爾濟蘇烏訥爾等奸貪害政今中書方欲  
用為各省平章參政等官宜如罷黜從之尋復以行

尚書省為行中書少  
百司庶務復歸中書

發明

托克托等變亂舊章流毒百姓其罪亦已甚矣五刑五用舍此而誰適皇太子既知其弊

悉皆革正托克托等則誅孟克特穆爾則流所以分首從而權重輕也此皆前人已壞之緒苟不一新政今則四海困窮而天之祿亦永終矣是乃撥亂反正之宏綱古今人心之天理而斯世寧不為之一快哉故特表而出之

廣義

仁宗速改其兄之不善其賢於武宗遠矣故特書皇太子者美之也

罷城中都

皇太子以司徒蕭珍城中都徵功毒民遂追奪其符印令百司禁錮之凡中都所括民田悉還之民

發明

昔魯人為長府閔子騫曰仍舊貫如之何何必改作蓋改作未免勞民而傷用一長府之

作閔子止之况役數萬之衆以築中都之城乎前書城中都此書罷城中都則仁宗憂民之心切而治國之心勤矣宜其得享承平之治也

以持們德爾為右丞相鄂勒哲李孟並平章政事○名

先朝舊臣程鵬飛等十五人

名先朝諳知政務老臣程鵬飛董士選李謙章律陳天祥尚文劉正郝天挺董士珍蕭軒劉敏中王思庶韓從益趙君信程文海十五人詣闕同議庶政天祥等五人不至謙至首陳九事正陳八事皆欲朝廷守成憲開言路重名爵節財用與學校定律令舉切時弊

二月罷喀喇托克托為江浙行省左丞相

托克托至進父老問民間利病咸謂杭城舊有便河通江漕湮廢已久若疏鑿以通舟楫物價必平僚佐或難之托克托曰吾陛辭日密旨許以便宜行事民以為便行之可也俄有詔禁土功托克托曰敬天莫先勤民民蒙其利則災沴自弭土功何尤焉不一月河已成

三月皇太子即位大赦

皇太后欲用陰陽家言令太子即位隆福宮御史中丞張瑄言當御大明殿帝悟移仗大明殿既即位親解所御衣及濟遜衣二十襲金帶一賜之

詔百司遞陞品秩者復舊制

詔武宗時百司遞陞品秩者悉從至元舊制既又諭省臣曰卿等哀集中統至元以來條章擇老且明法律者斟酌重輕折中歸一頒行天下俾有司遵行之則抵罪者庶無冤抑

### 寧夏地裂○遣宦者李邦寧釋奠於孔子

邦寧既受命行禮方就位忽大風起殿上及兩廡燭盡滅燭臺底鐵鐫入地尺許無不拔者邦寧悚息伏地諸執事者皆伏良久風息乃成禮邦寧因慚悔累日初帝在東宮邦寧知三寶努等畏帝英明乘間言於武宗曰陛下富於春秋皇子漸長父作子述古之道也未聞有子而立弟者武帝不悅曰朕志已定汝自往東宮言之邦寧慚懼而退及帝即位左右請誅之帝曰帝王歷數自有天命其言何足介懷如邦寧開府儀同三司為集賢院大學士尋卒

發明

邦寧前既為大司徒兼左丞相此何以不書不予其有是職也語曰吾不與祭如不祭帝

既不能親奠孔子則或遣親王或命大臣則庶幾可也今以邦寧闈奴而俾之祇謁先聖之廟乎既而大風滅燭弗克成禮此蓋夫在天之靈不欲享此非禮之祭也仁宗知敬孔子而不知所以敬之之禮是則欲敬孔子而反為所以褻孔子且曾謂孔子不如林放乎綱目據事直書所以祭千古之一笑爾

廣義

或曰分往載風起燭滅之事果有是乎曰有曰何以知其有也曰理焉而已吾夫子德配

天地道貫古今其形而下者與天雖異其形而上者與天則同故曰形雖是人其實則是一團天理天即理也理之所在氣亦隨之理氣有二乎哉蓋吾夫子與天合德豈刑餘奴隸之賤惡者可得而

奠享耶此理必然無可怪者不然宋光宗紹熙二年合祭天地是何風雨大作而黃壇燭盡滅耶綱目備書于冊者所以其元人之惡也夫何惑

### 夏四月罷行至大銀鈔銅錢

帝以至大銀鈔輕重失宜至元大元銅錢新舊恣用行之未久為弊滋甚詔並罷之楊多爾濟曰法有便否不當視立法之人為廢置銅錢與楮幣相權而用古之道也何可遽廢耶言雖不用時論是之

### 五月遣兵擊八百媳婦

陝西侍御史趙世延諫曰蠻夷事存羈縻先朝用兵不已致亡失軍旅誅戮省臣今第當選重臣知治體者付以邊寄兵宜勿用也不聽

秋七月賜李孟爵秦國公

孟感帝知遇頗以國事為己任見當時賜予太廣名爵太濫風俗太潛擬無章每勸帝言人君之柄在刑與賞刑不足懲賞不足勸何以為治帝在懷州深見吏弊既即位欲痛剷除之孟曰吏亦當有賢者在激厲之而已帝曰卿儒者宜與此曹氣類不合而曲為保護如此真長者之言也嘗謂之曰朕在位必卿在中書賜爵秦國公圖其象命詞臣贊之每入見稱曰道復而不名

增國子生為三百人

初帝命李孟領國子學諭之曰國學人材所自出卿宜數課諸生勉其德業至是又諭省臣曰昔世祖注意國學如博果密等皆蒙古人而教以成材朕今親定國子生為三百人仍增陪堂生二十人通一經者



以次補伴讀著為式既而孟等言方今進用儒者而老成日以凋謝四方儒士有成材者請擢任國學翰林秘書太常或儒學提舉等職俾學者有所激勸帝從之詔自今勿限資格果材而賢雖白身亦任用之

### 九月還陳益稷舊賜田

益稷言自世祖朝來歸妻子皆為其國人所害朝廷因遙授王爵賜漢陽田五百頃俾自贍今臣年幾七十而有司拘所授田就食無所帝謂省臣曰益稷來歸宜厚賜以懷遠人其進勳爵授田如故

### 冬十一月罷營繕

初帝諭大府監臣曰財用足則可以養萬民給軍旅雖一縑之微非朕命毋輒與人至是李孟言每歲支鈔六百餘萬錠人土木營繕百餘處計用數百萬錠內降旨賞賜復用三百餘萬錠北邊軍需又六七百

萬錠帑藏見貯止十一萬餘安能周給浮費宜悉停罷帝納其言罷諸營繕時都水監傳旨給驛往取杭州所造龍舟省臣諫曰陛下踐阼詔天下凡非宣索毋得擅進誠取此舟有乖前詔遂命止之

發明

罷營繕所以省財力也是時飢饉相仍弊政繼作此天下盡壞之時也帝於武宗弊政一

切更新如罷行至大銀鈔銅錢如增國子生如罷營繕皆武宗之所未行者帝能行之此其所以卓冠武宗也歟大書持書深予之爾

復以阿薩爾為平章政事○十二月詔停內降旨

帝初諭省臣曰朕前戒近侍毋以文記傳音中書敢有犯者律連其人治之至是省臣復言祖宗立選法憑黜陟以示激勸今官未及考或無故更代或躐等進階借受國公丞相等級諸司已裁而復置者有之

今春以來內降旨除官千餘人其中欺偽豈能盡知  
壞亂選法莫此為甚帝曰自今凡內降旨一切勿行

御批續資治通鑑綱目卷二十四



總校官候補中允巨王燕緒

校對官中書目杲模

謄錄監生巨夏謙